

Docente Sue-Ann Lee di Universidad di Aruba seccion Hospitalidad y Turismo:

“E decision tuma riba Bushiri ta satisfactorio, pasobra turismo ta importante, pero nos tambe ta importante”



PROME Minister Mike Eman y Minister di Infrastructura Benny Sevinger a duna un presentacion na decano, docente y studiantenan tanto di Aruba como di exterior di estudio ‘Hospitality & Tourism Management’ di Universidad di Aruba encuanto Turismo y Infrastructura. Esaki a tuma luga den edificio “Cocolishi”.

E presentacion a encera e proyectonan - tangibel y concreto - cu Gobierno a ehecuta y loke falta pa ehecuta. Tambe e enfoka riba calidad di bida di e ciudadano cu no semper ta cana man den man cu e desaroyonan rib’e isla. Gobierno den forma constante ta percura pa prosperidad wordo converti den bienestar pa tur hende.

Un punto cu a bin dilanti ta cu Gobierno ta evita pa apesar di e adelanto di Aruba, e. o. dor di un turismo creciente, cu nos herencia cultural, naturalesa y identidad no bay perdi a costo di e progreso aki. A trece ehempelnan dilanti y durante e sesion di pregunta, a sigui un amplio intercambio di pensamiento.

Na final decano sr. John Wardlaw y sra. Sue-Anne Lee, docente na UvA, a duna nan opinion di loke nan a scucha durante e presentacion. Sra. Lee a bisa cu ta importante pa no wak solamente e parti di teoria.

“Nos tambe ta wak e parti di turismo y infrastructura, pero e parti mas importante ta participacion di e comunidad den e decisionnan cu ta wordo tuma pa loke ta nos futuro.

Ta bon pa nos pero sigur pa e studiantenan wak aki cu tur cos ta bin cu un ‘policy in planning’. Kiernen cu bo kier pa loke bo haci dura largo pa generacionnan cu ta bin”, el a duna di conoce.

Pa loke ta e beachnan cu ta yen di palapa cu ta haci nan menos accesibel pa comunidad - aunke cu nan ta publico - sra. Lee a bisa cu esaki un preocupacion di docente y studiantenan tambe y semper bay tin discusionnan rib’e punto aki.



“E ta algo sentimental. E bunita beachnan cu ta di nos ta wordo ocupa mas tanto pa turistanan. Considerando cu Bushiri ta bay wordo transforma den un area publico ta duna nos y futuro generacionnan satisfaccion cu e area ey ta di nos. Un caminda cu nos por yega hunto - mescos cu e. o. na Arashi, Baby Beach y na canto di LG Smith Blvd - pa disfruta di loke ta di nos.

E vision ey ta importante pasobra e ta bon pa nos tur, pa e turista y sigur e ciudadano di Aruba.

Pa mi ta un satisfaccion cu decisionnan ta wordo tuma pa loke ta e topico aki. Gobierno ta tuma nos den consideracion den e decision aki. Turismo ta importante, pero nos tambe ta importante. E decision tuma pa loke ta Bushiri ta den nos beneficio”, sra. Lee a conclui.

Presentacion den Cocolishi di Ministernan Eman y Sevinger a cay den bon tera

"Vision di Gobierno ta refleho di loke studiantenan ta en busca di dj'e"

Segun Decano John Wardlaw



DIALUNA mainta tabatin un presentacion duna pa Prome Minister Eman y Minister di Infrastructura Sevinger den 'Cocolishi' pa decano, docente y studiantenan tanto di Aruba como di exterior di estudio 'Hospitality & Tourism Management' di Universidad di Aruba.

E presentacion a encera tur e proyectonan - tangibel y concreto - cu Gobierno a ehecuta y loke falta pa ehecuta. Tambe e enfoka riba calidad di bida di e ciudadano cu no semper ta cana paralelo cu e desaroyonan aki. Gobierno den forma constante ta percura pa prosperidad wordo converti den bienestar pa tur hende.

Un punto cu a bin dilanti ta cu Gobierno ta evita pa apesar di e adelanto di Aruba, e. o. dor di un turismo creciente, cu e herencia cultural, naturalesa y identidad no bay perdi.

Despues di e presentacion a sigui un rondleiding den henter e edificio cu a termina den sala di Consejo di Minister. Eynan tabatin un sesion di 'Q & A' cu a bay na satisfaccion di esnan presente. Decano di 'Hospitality & Tourism Management' di Universidad di Aruba sr. John Wardlaw a splica pakico el a haya e encuentro y presentacion hopi bon y informativo.

"E curso cu e studiantenan ta haciendo ta yama 'Geografia turistico' y esey ta e motibo cu nos a bin aki. Desaroyo turistico ta algo mundial. Tin varios capitulo pa atende den e desaroyo aki y un di nan ta e rol di Infrastructura. Unda nos kier mira Aruba den futuro. Hopi bes ta wak e beneficiacion economico ora ta papia di turismo y despues medio ambiente y con proteha esaki. Masha poco bes Gobiernonan ta pone enfoka rib'e aspecto cultural y social", sr. Wardlaw ta splica.

E decano a sigui bisa cu un di e puntonan di discusion na Universidad ta con Aruba a cambia den e ultimo 30 añanan, desde su desaroyo turistico.

"Kico nos no kier perde y unda nos ta mira nos mes aki 15 aña. Un di e puntonan di e curso ta e rol di Gobierno den e desaroyo cultural mientras ta mantene loke nos tin. Dus, ora nos a papia awe di 'Change without change' esey ta nifica cu tur hende kier mira desaroyo, pero no kier perde loke tin caba. Esaki no ta algo facil pa cumpli cu ne", el a agrega.

"Ora Eman y Sevinger a papia awe riba nan visionnan, tabata algo positivo pasobra ta exactamente loke e bukinan ta bisa.

Mi a keda agradablemente sorprende pa loke e dos cabayeronan aki a trece dilanti. Con nos ta mantene nos cultura y con evita cu turismo tin un impacto negativo rib'e isla. Ora bo tin gran cantidad di turista ta yega aki, bo ta haya intercambio di idea y asina bo por perde algo di bo cultura. E Arubiano no kier esey.

Ta p'esey cu ora awe Prome Minister a papia di Bushiri, con ta bay re-establece areanan di beach pa e comunidad, di e proceso di Linear Park y crea mas espacio pa recreacion, ta juist loke nos studiantenan y henter comunidad kier.

Tur hende kier mira nan cultura y herencia keda manera e ta. Ta p'esey cu awe tabata un momento fantastico di por a tende cu e vision di Gobierno ta un refleho di loke nos studiantenan ta en busca di dj'e. Pa mi sigur e presentacion tabata algo tremendo", sr. Wardlaw a conclui.

